

Prvi redovni sastanak ETUCE komiteta u novom mandatu održan je 29-30. marta 2021. godine. Sastanku, koji je zbog pandemije COVID-19 održan online, prisustvovao je član komiteta ETUCE-a, potpredsjednik SPCG Nikolaj Knežević. Predsjednik ETUCE-a, Larry Flanagan otvorio je sastanak, pozdravivši novoizabrane članove za ovaj mandat, uključujući nove članove koji su predstavnici organizacija članica iz Hrvatske, Malte i Turske u ETUCE komitetu.

Nakon predloga Komiteta žena, ETUCE je usvojio izjavu o povlačenju Turske iz Istanbulske konvencije, podržavajući poziv turske organizacije članice EGITIM-SEN na hitnu akciju. U ovoj izjavi ETUCE podsjeća da je Istanbulska konvencija prvi međunarodni sporazum, koji prepoznaje nasilje nad ženama i djevojkama, kao kršenje ljudskih prava i učinkovit je zakonodavni alat za osnaživanje žena i djevojaka i zaštitu njihovih temeljnih prava.

Jedna od glavnih tačaka dnevnog reda bila je priprema vanredne konferencije ETUCE-a, koja će biti održana 5-6. jula 2021. Konferencija pod temom „Za oporavak vođen obrazovanjem“ utvrdiće pravce djelovanja ETUCE-a u narednom četvorogodišnjem periodu. S obzirom na vjerovatnost nastavka ograničenja putovanja zbog pandemije, članovi Komiteta odlučili su da će se ova vanredna konferencija održati u saradnji s okruglim stolom za srednjoistočnu Evropu 7-8. jula 2021. Komitet je takođe podnio na usvajanje nacрте rezolucija konferencije na teme koje se odnose na vještačku inteligenciju, obrazovanje i klimatske promjene, te na visoko obrazovanje i istraživanje, kao i dva akcijska plana za obnovu sindikata, te jednakost i raznolikost u obrazovanju. Više informacija o vanrednoj konferenciji ETUCE-a uskoro će biti prosljeđeno organizacijama članicama ETUCE-a.

Komitet je takođe odobrio sastav Radne grupe za ravnopravnost ETUCE-a, Savjetodavnog odbora za obrazovanje i Radne grupe zadužene za ažuriranje ETUCE-ovog dokumenta o obrazovnoj politici i pripremu kampanje za podizanje statusa i atraktivnosti nastavničke profesije.

Visoko na dnevnom redu bila je razmjena iskustava o situaciji COVID-19 i njenom uticaju na obrazovni sektor u Evropi. Rezultati istraživanja koje je ETUCE sproveo o stanju vakcinacije nastavnika u evropskom regionu, kao i o otvaranju/zatvaranju obrazovnih institucija, pokazali su da se u približno polovini zemalja u regionu nastavnicima prilikom vakcinacije daje prioritet, ali uz ogromne razlike između obrazovnih sektora. Na osnovu ovog istraživanja i rezultata ETUCE istraživanja o uticaju pandemije na socijalni dijalog i kolektivno pregovaranje na nacionalnom nivou, članovi Komiteta su započeli živu diskusiju, uzimajući u obzir aktivnosti ETUCE politike sprovedene u 2020. i 2021. godini, kao i brojne webinare u vezi sa COVID-19 i redovne razmjene ETUCE sa evropskim donosiocima odluka.

Ažuriranje programa rada portugalskog predsjedništva i Evropske komisije u pogledu obrazovanja i obuke i ekonomskog i socijalnog upravljanja, uključujući izvještaj o zaključcima Savjeta za obrazovanje iz februara 2021. godine, otkrilo je snažnu prioritetnost obrazovanja i obuke u planovima oporavka zajedno sa izraženim fokusom na centralnu ulogu nastavnika i obrazovanja u digitalnoj i zelenoj tranziciji. Članovi ETUCE komiteta naglasili su potrebu za pravednom i inkluzivnom tranzicijom, koja se zasniva na većem javnom ulaganju u obrazovanje. Što se tiče obnavljanja uloge i značaja sindikata, sekretarijat ETUCE-a predstavio je i pozvao sve organizacije članice na ETUCE kampanju „Zajedno u sindikatu - Za kvalitetno obrazovanje“, koja će biti pokrenuta u maju 2021. godine.